

12.6.2008

Betreff: S Bulgari Täschli vom Spital

Hallo zämme

Es isch immer wieder e Erläbnis do in Asie in e Spital z goh..kei Panik, s isch nid schlimmer worde, aber dos ebbe au nid wirklich besser worde isch (d Hand isch immer no gschwulle und unter de Fingerbeeri fühlt sichs a, als ob s Luft drunter hätt und d Hut isch ganz hart) hani dänkt zur Sicherheit gang ich s nomol go zeige.

Also sinn mir in e vom Hotel empfohlene Klinik gefahre und ich ha däne mini Hand und dr Spitalbricht vom Navy Hospital zeigt. Dodrufabe het mi d Frau Doktor nümme wellä behandle! Ich hägi soviel und so starki Medis bekoh, sie chönni mir nüt me gäh mit guetem Gwüsse. Ich miessi das aber unbedingt emenä Spezialist zeige. Will ich scho soviel Medis bikoh hegi, miess ich drfür jetzt ihri Berotig au nid zahle :-). Also sinn mir in das mega, super, geniale, gestylte, trendy (Privat?)Spital gange. D Taxis wärde mit Spiegel untersuecht bevor sie ufs Areal dörfe fahre...

Dört bin ich denn super professionell berote, agluegt, untersuecht und getestet worde. Das mit dr Luft isch Flüssigkeit, dorum isch alles gschwulle und wägem Druck vo dr Schwellig bikumm ich so harti Hut! E Entzündig isch keini mehr vorhande und jetzt heisst nomol chli Tablette schlugge und die nögschte 5 Täg abwarte...Dä Bsuech isch öpe (mit Wartezyte) 2 Stund gange und het mi grad e Drittel vo mim Spitalufenthalt (1 Wuche, Medis, Arzt, Schwester, 4x Ässe, VIP Room) kostet!!!! S herrsche do uf Bali anderi Gsetz!

Drfür hani für mini Medis und Säbeli e ganz e schiggs Tragtäschli im Styl vo Bulgari bikoh und dr Kaffi isch au gratis gsi. Mr hänn natürlig zuegschlage.

S Wätter macht im Momänt au grad e chli Kapriole, dr Himmel will eifach nid blau wärde :-). Bi Euch het sich jo gestert z Obe dr Himmel überem Joggeli au grau verfärbt...glaub jede wietere Kommentar isch überflüssig. S Uffbliebe vom Mischa bis am 3 am Morge het sich jedefalls nid wirklich glohnt.

Jetzt, wos so langsam gegä s Änd vo dr erschtä Etappe zuegoht froge uns doch vieli, wenn as mir zrug chömme...wie plant irgendwann Mitti Juli, e genau Datum hänn mir aber nonig. S wird aber sicher für e Füre Bierli länge!

Am 22.6. wärde mir Indonesie verloht miessä (Visum isch z Änd), denn gönnt mir für e paar Tag uf Penang (Malaysia) go Lüt bsueche wo mr uff Lembeh kenneglernt hänn, denn gohts nomol uf Ranong (Thailand) um unseri Tauchusrüstige z deponiere und denn wärde mir in Bangkok so richtig geil go shoppe!!!!!!!!!!!!!!

Drmit ihr nid so viel zum Läse hänn duen i jetzt höre

Diggi Schmutz und e Umarmig
Carmen und Mischa